


21 50 JN

16

L. 25  
C. 8

# COMPENDIVM IN SPHÆRAM PER

*Pierium Valerianum  
Bellunensem.*



CAPITA QUAE TRACTANTUR,  
SVNT HAEC.

De Tota Mundi machina breuissime.

De Polis.

De Aequinoctiali.

De zodiaco.

De Regionibus Signorum.

Signa, quibus Planetis addicta.

De Tropicis.

De Arctico & Antarctico circulis.

De Coluris.

De Circulis mobilibus.

De Horizonte.

De Meridionali.

De Sphaera recta & obliqua.

De Motu Solis & aliorum Planetarum.

De zonis.

De Parallelis.

De Inaequalitate dierum & noctium.

De Calore & frigore.

De Eclipsibus.

Cur facies Lunae uariae.

Quid nox, quid dies sit.

De significationibus Eclipsis utriusque in u-  
noquoque signo, ex Proclo.

AD ILL. ET MA-  
XIME REVEREN. ADOLE-  
scentem Alex. Farnesium Card. S. R. E.  
Vicecancell. Pierij Valeriani Bel-  
lunen. Compendium in  
Sphæram.



VO D quæris, Alexander Car-  
dinalis Ampliſſ. terrarũ ſitum  
tibi breuiter deſcribi, quæris  
quidem rem & ſcitu iucundã,  
& ſtudijs tuis apprime neces-  
ſariam. Nam ſiue poetas, ſiue hiftoriam, ſiue o-  
ratores legas, quæ tuæ ſunt adoleſcentiæ primæ  
delitiæ, quoquò te uerteris, rei iſtius cognitio tibi  
fuerit opportuna. Intuitat uero te ſapientiſſimi,  
erudiſſimi quæ aui tui exemplum ad ea omnia  
ſtudioſius conſeſtanda, per quæ ille ad ſummũ  
rerum culmen euectus eſt: atque eos tibi pri-  
mos in diſciplinis gradus conſtituiſti, qui ad hu-  
mani ingenij captum propinquiores eſſe uideã-  
tur: ut gradatim inde ad reliquarum ſcientiarũ  
cognitionem, & conſummatiſſimã, qua ille plu-  
rimum pollet, doctrinam progrediariſ. Maſte  
igitur hoc animo, qui quæ auum reſers nomine,

*sapientia etiam æquare contendas. In quo spero Deum Opt. Max. optatis tuis facillime responsum: tu modo hac præditus indole, his honorum auspiciis, totq; eruditissimorum hominum, quos domialis, auxilio communitus paululum quid enitere, dum institutum cursum arripias, reliqua negotio minimo, ac sine pulvere consecuturus. Quoniã uero terræ ipsius situs, descriptio, dimensio que ad celi rationem accommodanda est, de celo prius, celi que partibus differere quam breuissime apertissimeq; possem necessarium existimaui: quòd hæc præsertim pars ut latina dictione tradatur desiderari hæctenus uisa est. Fuerunt enim plerique etiam Latini homines, qui rem minus latine in uulgus edidere, quamuis cætera diligenter examinarint. Curauimus autẽ ut ea esset in institutione nostra facilitas, ut tenera qualibet ætas doctrinæ huius capax fieri posset. Nam & superflua pleraque, ne inepta dicam, quæ plerisque fastidium afferre consuerant, à me summota reiectaque sunt, eaque tantum admissa, quæ ad simplicem spheræ ipsius cognitionem necessaria uidebantur. Illa autem quæ postea subsequuntur, ad orbis geographiam pertinentia, unoquoque uel mediocriter erudito commonstrante, uel tuo ipsius studio*

studio facillime consequeris.

DE TOT A MVNDI  
machina.

**I**llud uerò primum omnium tibi fuerit mente concipiendum, terram hanc, quam incolimus uniuersam unà cum aqua circumfusa, ac illi intra supraque, & infra etiam adherescente, pilæ cuiusdam obrotundæ modo considerari debere: quam circum aër undequaque diffusus circumplectitur: eodemque modo aër à circumfuso igne confouetur. Quatuor enim his simplicibus, terra quippe, aqua, aëre, & igne omnia constât, quæ mox in uarias rerum species conformantur. Supra corpora hæc, ut fieri potest, orbicularia septem Planetarum orbis alterum alteri instar corticum cepis incumbentes astronomorum subtilitas adinuenit, Luna scilicet, Mercurij, Veneris, Solis, Martis, Iouis, & Saturni. Supra Saturni sphaeram stellarum fixarum orbis esse creditur.



Huc usque humanae vis aciei fertur, totumque  
 caeli ambitum igneis quibusdam clavis confixum  
 arbitratur. Supra tamen stellas caelum aliud esse  
 fertur, quod primum mobile antiqui sapientes  
 uocant, utpote quod summi Dei (neque enim  
 aliter credendum est) imperio concitatum, assidu-  
 da rapidissimaque uertigine ruens ab oriente  
 occasum uersus, mox ab occasu ad orientis ter-  
 minum sese circumuoluit: trahitque secum &  
 stellarum fixarum orbem, & planetarum omnium  
 sphaeras. Quamquam illae, uti uidebimus inferius,  
 relu-


reluctabundæ eo lentius aliæ, celerius uero aliæ trahuntur, quo primo. illi orbi rapidissimo uel propinquiores, uel longinquiores fuerint. Iuniores decimam adinuenerunt sphaeram, cui non nulli pernicitatem eam attribuerunt: alij contra perpetuam rerum diuinarum quietem in ea statuerunt: ubi scilicet diuini spiritus, piorumque animæ adsistant Deo: aternaque omnino tranquillitate perfruantur. Sed enim hoc hic disputare nostri non est instituti: qui ad simplicem quandam cæli traditionem properamus. Scias tamen inter astronomos & philosophos de cæli orbibus minime conuenire, neque etiam de planetarum situ & ordine: sed nos hæc tibi, ut à pluribus traduntur exponentes, quæstiones in aliud tempus differemus.

## DE POLIS.

**E**Sto igitur cælum, ut uno omnia uocabulo complectamur, ad pomi huius, quod nunc præ manibus est, similitudinem orbiculatum. (utar enim hoc ad partem, qua de nunc agimus, satis idoneo) Vertitur hoc, ut diximus, supra terram ab oriente occidentem uersus: & ab occidente sub terra ad orientem, eo usque, unde ma-

ne ferri cœperat, quatuor & uiginti horarum  
spatio. Cardines, quibus inniti uidetur, aut circa  
quos uersatur, duo, poli græco uocabulo nuncu-  
pantur. πολῶ enim uerto est. Horum unus, po-

mi scilicet uertex  
hic summus, unde  
flos abijt, arcticus  
appellatur ab Vr-  
sa, quam poetæ in  
celum retatam fa-  
bulantur. Arctos  
enim græcis, la-  
tinis Vrsa. In hæc



autem mutatam fuisse Calisto legisti apud O-  
uidium. Alter qui huic oppositus è regione est,  
Antarcticus uocatur uocabulo ipso oppositio-  
nem indicante: quem nos in pomi pediculo sta-  
tuamus. Hos autem astronomi, mundi Polos  
uocant, propter prerogatiuam primi cali, ad cu-  
ius rapidissimæ uertiginis celeritatem reliqui  
omnes orbes, uti paulo ante dicebamus, eodem  
ferè uigintiquatuor horarum spatio circunse-  
runtur.



## DE AEQVINOCTIALI.

**A**B his punctis tota desumitur celi dimensio. Primò enim circulus æquo ab utroq; intervallo distans per pomi tuberositatē ducitur: qui



æquinoctialis appellatur, ea scilicet de causa quòd Sol unoquoque anno huiusmodi circulum his attingens, dies noctibus pares facit.

## DE ZODIACO

**D**iffecat hunc per obliquum fascia quædam lata, dimidia sui parte ad arcticum obversa,



altera ad antarcticum inclinata, quæ à 12. animalium formis, quibus insignita perhibetur, zodiacus circulus Grecis nuncupatur, signifer Latinis: qui duodecim

figuras eas signa uocant. Horum primus Aries,  
 qua primū parte ab æquinoctiali zodiacus di-  
 uertēs in arcticum cœpit porrigi, inde Taurus,  
 & huic proximum Geminorum signum: com-  
 pendiosis autem notis ita figurantur,  $\gamma$ .  $\delta$ .  $\Pi$ .  
 Posteaquam per tria hæc signa arcticum uersus  
 obliquo tramite progressum est, reflecti incipit  
 fascia, & ad æquinoctiale rursus redire, quem  
 tribus itidē distincta signis, Cancro scilicet, Leo-  
 ne, & Virgine, quorum hæ notæ sunt,  $\zeta$ .  $\eta$ .  $\nu$ .  
 simul ac attigit, inde antarcticum uersus ab æ-  
 quinoctiali dilapsa, trium adhuc signorum spa-  
 tio, quæ sunt Libra, Scorpius, Sagittarius, quæ  
 ita notantur.  $\omega$ .  $\mu$ .  $\phi$ . exporrigitur. Mox per-  
 tæsa loci ab infima ea regione ad æquinoctialem  
 rursus sursum uertitur, aliis tribus signis Capri-  
 corno, Aquario, Piscibus insignita, quæ ad hūc  
 modum figurantur,  $\rho$ .  $\sigma$ .  $\tau$ . Hic uero circulus  
 nec non omnes, quotquot in sphaera nominā-  
 tur, in duodecim has primū partes, ab ipsis sci-  
 licet signis diuiduntur: mox unaquæque pars  
 30 gradibus ita appellatis distinguitur, atque ita  
 totus uniuscuiusque circuli ambitus trecētis &  
 sexaginta gradibus dispescitur. Latitudo zodiaci  
 per duodecim circiter gradus extenditur. me-  
 dium eius qua parte plurimum abit, ab æquino-  
 ctiali

Et ali distat gradibus tribus circiter & uiginti. Habet uero zodiacus & ipse polos suos, quibus quidem zodiaci polis innixi orbes calorum omnes, qui sub fixarum stellarum celo sunt, motu quodam suo uersantur, de quo inferius loco suo dicetur.

## DE REGIONIBVS SIGNOR.

AB his polis circuli ducti qui unius cuiusque signi terminos secant, uniuersum sphaerae corpus in 12 partes aequales diuidunt, ueluti si peponem quis in 12 portiones aequas diffecaret. Et quicquid inter duos huiusmodi semicirculos, ut ita nunc uocem, ab uno polo ad eorum alterum continetur, eius signi regio esse dicitur, quicquid in medio continuerit. Inde stella quaevis extra zodiaci spatia quantumlibet procul sita, in A-



riete, uel Tauro, uel Geminis esse perhibetur.

**E**T quoniam unumquodque signum gradibus, uti dictum, 30 constat: eodem modo per gradus uniuscuiusq; terminos ductæ in angustum lineæ per polos suos, efficient, ut quo etiã gradu huius uel illius sideris stella qualibet toto celo contineatur, appareat. Sed hæc non nisi in sphaera solida discerni possunt.

*SIGNA QUIBVS PLANETIS ADDICTA.*


**O**Ecodeſpotas autem docere loco hoc congruum uidetur, siquidem aiunt astronomi ex planetis Solem uni Leoni præesse, uni uero Cancro Lunam: reliquos, duobus singulos signis esse præfectos, Saturnum quippe Capricorno, & Aquario. Ioui subijci Sagittariũ, & Pisces: Marti Scorpium, & Arietem: Veneri Librã unã cum Tauro: Virginem & Geminos Mercurio. Cuius rei compendium hac figura subiecimus.



## DE TROPICIS

**S**ed enim ut ad circulos reuertamur, sum-  
 mus ille locus, quo per tria prima signa zo-  
 diacus attolli nobis uidetur, medio suo circulum  
 diurna uertigine describit, qui tropicus Cancri  
 nuncupatur, qui scilicet Cancro incipiente, fle-  
 ſſi ad inferiora ipsa incipit fascia: Latini con-  
 uersionem æſtiuam appellauere. Simili ratione  
 locus infimus, quo ſ. peruenerat Sagittarius, &

unde Capricornus  
in sublime attolli  
coeperat. aliū ea-  
dem uertigine cir-  
culum delineare  
fingitur, qui Capri-  
corni tropicus, ob  
conuersionem sci-  
licet ipsam, ab  
astronomis uocatur, ab æquinoctiali uterque  
distans 23 gradibus.



DE ARC. ET ANT. ARC. CIRC.

**P**roxime autem  
ad polum cir-  
culus alius effingi-  
tur, quem circun-  
actus zodiaci po-  
lus, uti paulo supe-  
rius dictum, descri-  
bit, atque is Arcti-  
cus ab Vrsæ imagi-



ne dicitur, è cuius regione alter quoque huic si-  
milis ad alterum polum statuitur, ab inferiore  
zodiaci polo signatus, quem antarcticum cir-  
culum appellauere, hi quoque gradibus circiter  
23 à polo distantes.

**S**Vnt uero alij duo circuli, Coluri nūcupati, quorū unus per puncta, ubi æquinoctialis a signifero dissectatur, & per



polos mundi ducitur: alter pariter per utrosque tam mundi quàm etiam Zodiaci polos, & puncta illa, quæ tropicos signant, trahitur, sphaera omni per duos huiusmodi circulos in partes quatuor æquales partita: ideóque Coluri, quasi dissecti & imminuti nuncupantur, quanuis nonnulli eorum rationem supra finitorem tantum æstimarint, ideóq; ridicula quædam de nomine somniarint. Atque omnes hi quidem circuli, firmi, stabilesque, eodem semper tenore modóque, omnibúsque regionibus ydem statuuntur.

DE CIRCVLIS MOBILIBVS.

**M**Ox & alij duo circuli non ydem omnibus regionibus, neque eodem omnibus tenore modóque: sed prout unus quisque locus

COMPENDIUM

exortum, aut occasum uersus situs est, & ab æquinoctiali magis minúsue remotus, mobiles, & ad unius cuiusque loci personæue situm accommodati.

DE HORIZONTE.

**H**orum unus, qui quidem partem eam cæli

dissecat, quam oculis quoquouersum in orbem circumacti dimetimur, horizon Græcis dicitur, Latinis finitor, aut terminator. Relinquit is scilicet dimidium cæli nobis intuendū: reliquum, inferius positum è conspectu adimit. Quæ



pars supra finitorem nobis inspicunda conceditur, illud est superius hemisphærium: quæ uero supprimitur, inferius hemisphærium nūcupantur.

DE MERIDIONALI.

**A**lter ex mobilibus circulis meridionalis uocatur, qui s. per arctici poli punctum & cæli



caeli locum eum, qui perpendiculariter capiti nostro incumbit, ducitur, & per dissectum, ubi fors tulerit, æquinoctialem ad polum usq; antarcticum descendit, eoq; omni hemisphærio decursu ad arcticum emergit. Circulū



hūc, ubi ubi loci fuerimus, cū Sol attingit, meridies est nobis, merinoctium Antipodibus. Atq; hic tibi uariis, pro ut occasum aut exortum uersus tetenderis. Neque grauabor tibi dicere caeli punctum illud quod uniuscuiusque uertici ad perpendicularum imminet, Zenith barbaro quidē uocabulo, sed astronomis nostris passim iam recepto, nuncupari. Hi duo igitur imaginarij circuli mente concipiendi, ut pro locorum mutatione, per unum, poli altitudinem supra horizon-tem nostrum, atque ita, quantum à tropico, uel arctico, uel alijs circulis intra polos descriptis recedimus, edoceamur: per alterum uariis eclipsium apparitiones, & locorum interualla, quæ intra ortum & occasum inter hos & illos in-


cidunt, ad certam reduci posse dimensionem. Hinc uero sphaera, modo recta, modo obliqua consideratio sese offert, quae quidem non otiose fuerit examinanda. sic igitur super ea philosophemur.

DE SPHAERA RECTA  
& obliqua.

Sphaera porro alia recta, alia obliqua dicitur. Recta quando Horizon utrunque polus secat, & populis, quibus ea ita sita



est, dies & noctes semper aequales sunt, quod tota torrida zona ferè accidit, de qua paulo inferius differemus. Rectam etiam nonnulli uocant, ubi polus uertici nostro imminet perpendiculariter, & aequinoctialis est Horizontis loco. Et ubi ea est, uniuersus



versus annus nocte una semestri constat. Atq;  
hæ regiones illæ sunt, quæ glaciales appellatur,  
antiquis quidem parum cognitæ, nostro autem  
tempore multorum diligentia, pertinaciq; la-  
bore perquisitæ, peruiæque iam omnibus factæ.

Obliqua, quando  
alter polorum ma-  
gis altero supra  
Horizontem at-  
tollitur. Et tunc  
contingit per an-  
num noctes & dies  
inæquales esse,  
incrementumq; id



è magis augeri, quo magis Zenith ad polum  
appropinquat. Idque accidit duabus Zonis, quas  
temperatas nuncupamus, quæ ubi, & cuiusmodi  
sint, inferius apparebit.

## DE MOTV SOLIS ET aliorum planetarum.

**Z**odiacum medium dissecat linea quæ vo-  
catur Ecliptica, sub qua Sol assidue fertur,  
neque ab ea unquam uel tantillum aberrat.  
Sub eodem Zodiaco feruntur & planeta re-  
liqui, Sole quidem liberiores, sed Luna cohibi-  
tiores,

tiores, excepto Marte, qui plurimmm excedit. Nam alij parum quid ultra eclipticam transgrediuntur. Luna liberius, intratamē Zodiacum, per quinque quippe gradus supra uel infra progressa spatiatur.



Mars ad octo interdum gradus ab ecliptica declinat. Duodecim illæ Zodiaci partes, quæ signa uocantur, triginta singula, uti dictū, gradibus distinguuntur: atque ita Zodiacus omnis in trecentos sexaginta gradus distribuitur. Sol autem diebus singulis ab occidente orientem uersus nixus unoquoq; die gradum unum, minutis interdum aliquot superantibus, interdum deficientibus progreditur, quanuis primi mobilis impetu raptatus 24 horarum spatio in contrarium ab oriente occidentem uersus rapiatur: atque ita 360 dierum spatio Sol uniuersum Zodiacum perambulasse deberet. Sed enim, uel quia in tropicis obeundis nescio quid moræ contrahit, ut ueteres opinabantur, uel, ut iuniores deprehēdere, in unoquoque ferè gradu minimū quid

quid quotidie superest. quinque insuper dies & horæ sex accedunt, antea quàm annuo decurso spatio ad punctum perueniat, unde ferri cœperat: fitque annus ipse ex 365 diebus, & horis sex, quæ quidem horæ quarto quoque anno supputatæ diem unū efficiunt. Vnde Aegyptij, qui annum suum perfectum quadriennio quoque metiebantur, annū hunc cōmunem per descriptam iugeris quadram figurabant. Erat uero hæc termini cuiusdam signū. Singula enim iugera quatuor apud eos terminis insignita erant. Quartus itaq; quisq; annus, apud nos, uno plus reliquis die, maior est: isque uulgo, bis sextus appellatur, propterea quòd eo anno bis scribitur, sexto Cal. Martias. Nā 24 Febr. diui Matthiæ uigilia celebratur, atque ita festus eius dies in 25 differtur, nihilosecius tã die uigiliæ quàm die festo, 6 Cal. Martias dicimus. Luna simili motu ad orientem & ipsa tendit, quanuis ea quoque ui primi mobilis in aduersum trahatur. Sed enim, uel quia plurimum distat ab ea ui, uel quia orbem omnium minimum sortita est, quod iter annuo Sol spatio dimetitur, ipsa septem & 27. uiginti dierum spatio superat, mox biduum consumit in assequendo Sole, qui iam unius ferè signi spatium transierat. Atque ita fit, ut nono

*semper & uicesimo peracto die sub Sole tran-*  
*seat, atque illum mox prætereat: diciturque Lu-*  
*nae coitus cum ea ad gradum punctūq; , in quo*  
*Sol est, applicuerit. Saturnus ex planetis , quod*  
*Sol anno uno, Luna eo dierum paucorum spa-*  
*tio metiuntur , cum proximus ipse sit celo ra-*  
*pidissimo, maiorem uim patitur, uel quia ma-*  
*iore fertur orbe, 30 annorum spatium Zodiacum*  
*perambit: Iuppiter 12: Mars biennio: Venus, atq;*  
*Mercurius eodem ferè cum Sole cursu ferun-*  
*tur, sed modo eum antecedunt, modo ueluti cur-*  
*su delassati iungunt iter: modo pares conferunt*  
*cū eo gressus, de quibus suæ sunt apud Astron-*  
*traditiones. Octaua etiam sphaera, quæ, ut plu-*  
*rimorum est opinio, stellas fixas continet, natu-*  
*rali motu fertur in Orientē: sed quia primo mo-*  
*bili uicina est, longe maiore patitur uim. Hinc*  
*accidit ut non nisi centum annorum spatium per*  
*gradum unum promoueri possit. Sed Astrono-*  
*mi plerunque minorem annorum numerū de-*  
*prehendere. Constat tamen ab Augusti Octa-*  
*uiani tempore ad hanc usq; diem, qui anni flu-*  
*xere 36 supra mille & quingentos, Solem qua-*  
*tuordecim fermè dies progressum. Nam eo tem-*  
*pore, ut obseruat Plinius brumæ dies uigesimo*  
*quinto Decembris erat: quo die natus est Chri-*  
*stus*

stus assertor noster. Bruma uerò, si ea est ingressus Capricorni, nunc est, ut plerique supputant, statim ab eiusdem mensis undecimo: Graeci tamen brumã & tres alios cardinales octauo omnes gradus Capricorni, Arietis, Cancri & Libræ statuunt. sed hæc alia est cõsideratio. Diligentiores quidam undeuiginti dies deprehendere, qui iam deberent intercalari. Quare nisi annus aliquando corrigatur, ut Leonis X. tempore sapientissimus auus tuus, Max. hodie Põt. faciendum censebat, futurum olim est, ut salutis nostræ natalitij dies, qui brumales olim erant, in uernum tẽpus inuadant, pascha in æstatem. Sed nos hanc ipsis rerũ dominis curam, & tibi fors, ubi adoleueris, relinquemus, & quod instituti operis munus exigit, prosequemur. Super sedeo uero hic de nona sphaera tibi quicquã differere: quam nouem & quadraginta milliũ annorum spatio aliorum planetarum instar aduolui tradunt. Eius enim speculatio alterius est negotij. Neque tamen dissimulabo antiquorũ quorundam opinionem, qui motum unum tantum in caelestibus huiusmodi corporibus existimarunt. Omnia scilicet uelut equos è carcèribus, uno emissa signo, ab oriente occidẽtem Solem uersus cursum arripuisse. Accidisse uero, ut

Sol metas omnes circūactus uno gradu segnius eò rediret, unde ferri coeperat: ita & planeta alij aut plus, aut minus properarint, ut Luna omnium tardissime aduentasse uideatur. Neq; tamen ab agitatione cessatum, sed institutum, ut quibus planeta quisque uiribus contendere possit, eo feratur nixu, neque cogatur quicquam ultra uires suas attentare. Atque hos esse defectus uarios uolūt, de quibus poetæ meminerint, pro spatij scilicet modo, quo fuerint à primo mobili superati. Alij alios atq; alios motus excogitarunt, quos importunum esset hic enumerare, cum nihil aut parum ad sphaeræ fabricam faciat. Suus tamen his alibi erit locus.


## DE ZONIS.

**V**Tt uero ad uniuersum cali corpus reuertamur, tota ea moles quinque distinguitur Zonis: quarū media ea est, quæ inter utrūq; tropicum continetur: eam diffecat mediam æquinoctialis, in obliquum uero Zodiacus amplexatur. Et quoniam Sol sub Zodiaco semper est, accidit ut bis annis singulis eam pererret: dū scilicet à Capricorno ad Cancrum fertur: mox dum à Cancro ad Capricornum reuertitur. Ita fit ut a sidue Solis ardoribus exusta nullum refrige-



frigerandi spatium nancisci possit: ideo quæ torrida consensu omnium uocatur. Duæ mox regiones, quæ orbis potius quam zona uocandæ essent, à forma quippe orbiculari, qua præditæ sunt, arctico una, antarctico altera circulis circumscribuntur. Vtriusq; polus suus pro centro est. Atq; hæ sunt, quæ glaciales ab omnibus uocitantur.

Alteræ cæli regiones duæ, quæ scilicet intra conuersionem Cancræ, & arcticum circulû, quæq; intra conuersionem Capricorni & antarcticû continentur, quia calorem frigori commiscunt, temperatæ fiunt, perq; uices annuo spatio nunc abeunte Sole obrigesunt, nunc eo appropinquante concallescunt.



Has appellant habitabiles, has temperatas, has munere deorum immortalium animantibus concessas aiunt. De quibus apud Maronem:  
 Quinque tenent calum zona: quarum una  
 rusco  
 Semper Sole rubens, & torrida semper ab igni:

COMPENDIUM

Quam circū extrema dextra leuāq; trahuntur.  
 Cærulea glacie concreta, atque imbribus atris:  
 Has inter, mediāque duæ mortalibus ægris  
 Munere concessæ diuūm, & uia secta per  
 ambas,

Obliquus quā se signorum uerteret ordo. Ad  
 eandem porro faciem ipsa etiam tellus iisdem  
 zonis distinguitur: glacialibus enim hinc &  
 inde ad polos constitutis, torrida sub zodiaco,  
 duas inde medias temperatas habet, ut apposita  
 indicat figura.



Tametsi, quantum ad torridam spectat, Græcorum aliquot disputationes non desunt aliorū, inhabitabilem propter æstus intolerabiles, aliorum temperatissimam eam esse propter dies & noctes

noctes semper aequales, afferentium. Quæ quidē  
 ultro citrôq; examinata apud Possidonium &  
 Cleomedem videre poteris. Nam & qui nunc  
 terrarum marisque orbem supra infrâque na-  
 uigant, maximam cæli temperiem sub æquino-  
 ctiali se deprehendisse autumant. Sanè autem  
 Ouidius Ptolemæi, atque adeo communem se-  
 cutus opinionem, dixit.

Vtque duæ cælum dextra, totidémque sinistra  
 Parte secant zônæ, quinta est ardentior illis:  
 Sic onus inclusum numero distinxit eodem  
 Cura dei, totidémque plagæ tellure premuntur:  
 Quarum quæ media est, nõ est habitabilis æstu.  
 Nix tegit alta duas: totidē inter utranq; locauit,  
 Temperiemque dedit mixta cum frigore flâma.

## DE PARALLELIS.

Cum autem constitutum sit ex iis quæ su-  
 perius enarrata sunt, Solem unoquoq; die  
 contra diurnam cursum gradum zodiaci unum  
 orientem uersus obrepere: hinc accidit ut pro-  
 pter zodiaci obliquitatem diebus singulis nouū  
 quendam circulum in cælo describat, turbinata  
 uertigine, altero iuxta alterum, funiculi in spirā  
 collecti instar, adhærescēte: à Capricorni quippe

primo gradu exorsus, usque ad primum Cancrī: mox reciprocatione facta à Cancro Capricornū usque eandem replicet spiram, eosdemque circulos duētu perpetuo describat: ita neque hodie eodem horizontis termino oriatur, quo heri emicuit, neque quo hodie loco apparuit cras sit oriturus.


Hi uero circuli, qui numero sunt cētum circiter & octoginta, pari scilicet dierum numero, quo semestre constat anni spatium, paralleli nuncupantur. Facti uero sunt hi paralleli ad instar funiculi, quē tu non-



nunquam turbini solitus es obuoluere, cū puer eum parabas ad iactum. Ab imo uerò crescit habena ipsius circumductus, ueluti unusquisq; dies per uniuersum semestre habenam sibi semel circumducat: dicunturque paralleli græco uocabulo, quòd æquo inter se distent interuallo: & in sphaera quoque dicuntur paralleli, & ad eius simili-

similitudinem in continenti, ibi circuli, hîc line-  
nearum ductus, quicunque parem equidistan-  
témque inter se latitudinē tuentur, huiusmodiq;  
lineæ toto terræ tractu ab oriente occasum uer-  
sus ab cæli gradibus singulis ductæ, parallela à  
cosmographis appellantur.

Quoniam uero pa-  
rallelorum, de qui-  
bus primo ageba-  
mus, ductus à par-  
te ea horizontis,  
quæ ad orientem  
est, ad alterã, quæ  
occidētalis est, quã-  
tum ad diurnarum




horarum incrementum, diminutionémue per-  
tinet, considerantur, accidit ut finitore per obli-  
quum porrecto paralleli ipsi diurni eo breuiores  
arcus habeant, quo sunt Capricorno proximio-  
res, puta funiculi ductus in turbine, qui cuspidi  
proximius trahuntur: eo uero magis exporrigã-  
tur, quo magis ad Cancrum tendunt, quippe ad  
partem turbinis latiore.

Quod quidem minime accidit in sphaera re-  
cta, utrouis modo quis rectam intelligat. Siqui-  
dē quibus polus ipse Zenith, est, uno emersu Sol

COMPENDIUM

semestrem diem  
affert: atque uno  
itidem occasu e-  
iusdem lōgitudi-  
nis noctem facit.  
Ita illis mēses xij.  
unus est dies exijs,  
qui luce & tene-  
bris constant.




Vbi uero horizon æquinoctialem secat ad an-  
angulos rectos,  
quod accidit cum  
per utrunque po-  
lum ductus fue-  
rit, parallelorum  
arcus diurni, no-  
cturnique inter  
se pari sunt dimē-  
sione, ac perinde



dies atque noctes pari horarum spatio, xij quip-  
pe utriusque numero attributis, perpetuo agunt  
æquinoctio. Tota uero torrida arcus huiusmodi  
ferè pares sunt, quare per meridionalem ad L.  
circiter gradus manifestum est paruam esse die-  
rum ac noctium differentiam, sub æquinoctiali  
uerò dies prorsus esse pares noctibus.

DE INÆQUALITATE  
dierum ac noctium.


SEd ut de zonis, locisque aliis quæ plurima dici possent, copiosissimè ab aliis tractata, missa nunc faciamus, satis superque nobis fuerit, quæ regioni nostræ accidant explicare: deq; zonæ eius, quam incolimus, cōditione disputare. Variat hæc dies ac noctes, prout Sol magis minusve ad Cæcrum accedit, aut recedit: siue huius rei cardinẽ Capricornum statuere uoluerimus: idq; uti dicebamus, accidit tam ob zodiaci quàm ob horizontis nostri obliquitatem. Sed quoniã hoc oculis discernendum est,



age spherã ipsam in manus capiamus. Et finito re primũ ad poli certam altitudinem constituto, puta gradu XL. age ceream hanc lenticulam puncto illi apprimamus, ubi incipit Capricornus. Sitque huius ceruleæ facies Sol ipse: tollamus nunc qua parte exortus est, quippe à dextera nostra Solem supra horizontem, sensimque meridie-

nalem usque deducamus. Bene habet. hic eam  
 sistamus. Tu uero enumera nūc gradus per Tro-  
 picum (is enim huius loci parallelus est) qui à  
 meridionali ad horizontem usque sunt, quam  
 uiam puta hodie Sol iuit. Hi circiter sexaginta  
 sunt. Solem autem scimus unaquaque hora gra-  
 dus celi 15 permeare. Hi uero sunt non plures  
 quàm sexaginta. Quatuor hoc est horarum spa-  
 tium, quo peruentum est ad meridiem: totidem-  
 que gradus, horæque totidem residuæ sunt ad  
 occasum usque: eritq; dies hic horarum octo.

At si polus altius  
 attollatur, horizō  
 fit zodiaco pro-  
 pinquior, déq; ar-  
 cu Tropici, quem  
 primū statuimus  
 parallelū, eo plus  
 adimit, fitque bre-  
 uior dies: quo ue-




rò magis polus ad horizontem deprimitur, eo  
 minus horarum diurnarū amittitur. Hinc tāta  
 horarū accidit tota zona uarietas, ut alibi Sol  
 per unā, duāsue, aut treis plurimum horas se ui-  
 dendum exhibeat, alibi per quatuor, alibi per  
 quinque: Et ita per singulorū graduum motum,  
 quo



quo polus supra horizontem uidetur attolli, sigillatim ad 24 usque horas nostræ dies zone progreditur. Extra hos terminos, uti dictum, in torrida æquinoctium ferè perpetuum, in glacialibus, mensurus, bimestris, trimestris, quadrimestris, quinque alicubi mensium, & semestris sub polo dies habentur: quæ singula tumet ipse attollendo deprimendoue horizonte deprehendes, & à cosmographis passim obseruata comperies.

Eadem autem ratione, qua diem dimetimur, noctem quoque in semestri altero commetiemur: quæq; de Capricorno super die locuti sumus, ea nocte su-



per, ad Cancrum referuntur. Arcus enim ille æstiuæ Tropici, quem nox ipsa percurrit: cuius punctum è regione Solis in Cancro statui necesse est, quantum extendatur uides. Sexdecim enim horas amplectitur, cum per gradus excurrat ducentos circiter & quadraginta.

Si uero cerulam eam quam pro Sole affixeram-

mus in primū Cancrī punctum transtulerimus,

Et ab ortu occasum usque in tropico dimensi fuerimus, magnam deprehēdemus in tercapedinē: quæ ab horizonte orientali ad occidentalem usque



porrigitur: idque Soli, die toto superādum, breue illud quod infrā erit, nocte percurrendum.

Hunc porro circulum astronomi octo dimensī portionibus, diurnæ parti quinque, nocturnæ uero treis distributas inuenere. Sed enim hæc in simplici hac spheræ traditione non sunt usque adeo minutatim perquirenda. Hinc patet à Capricorni gradu primo, Sole ad Arctos iter suum dirigente dies augeri quotidie, usque dum ad Geminorum exitum peruenerit: esse tamen intra finem Geminorum, Et prima Cancrī puncta, siue gradus dicere uoluerimus, moram aliquam, ut per aliquot dies, dum eandē uiam nobis itare apparet, loco dimoueri uix discernatur, unōque Et eodē parallelo oriri uideatur. Gradus enim illi aspectui nostro non obliqui, sed recti potius appa-

apparent, quod tempus nostri solstitium appellauere. Mox à principio Cancrì ad finem usque Sagittarij quotidie imminuitur dies. Et circa cardinem hunc, primos quippe Capricorni gradus, brumales illi dies sunt, solstitiumque hyemale, noctibus totius anni quàm longissimis.

Quòd uero nonnulli solstitium utrunque singulis diebus absoluunt, errorem esse ipsa comprobatur experientia. bis uero anno quolibet, cum scilicet



Sol ad ultimos gradus Piscium peruenerit, & primos Arietis inuaserit, neque nõ cum extremam Virginis partem, & Libræ primam permeat, cum arcus illi parallelares tam diurni, quàm nocturni pari ferè dimensione sint, fieri contingit æquinoctium. Verum hoc euidentius, quàm solstitium, designari potest, & uno tantum die, uel una nocte describi: quia obliquus Solis meatus facile transcursum indicat. Ac ut uno deniq; uerbo dicamus, prout Sol magis aut minus polo nostro propinquat, ita diem augeri

uel minui manifestum est. Hinc tibi Virgilianũ  
illud liquet,

Cur tantum Oceano properent setingere Soles  
Hyberni: uel quæ tardis mora noctibus obstet.

## DE CALORE ET FRIGORE.

**E**Adem ratio, idẽmque Solis cursus, aduen-  
tũsque aut recessus in causa est, cur anni  
tempora nũc æstuosa, nunc rigentia, nunc tẽpe-  
rata fiant. Nam cũ Solis mora supra horizõntẽ  
calorem insp̄iret, nox uero refrigeret, euenit ut  
hyemali tempore nox multum inuehat humo-  
rem, ac perinde totum celi tractum refrigeret,  
concrescãtque aër ipse ob frigus: cuius munus  
est liquentia condensare, adeo ut Sol exiguo eo  
temporis spatio, quo se nobis ostentat, mox ad  
inferiora cali sub horizõtem, statim raptus nul-  
lam habeat facultatem, neque crassiciem aëris  
perrumpendi, neq; calorem suum more saltem,  
qua lucet, beneficio sensim immittendi: atq; ita  
omnia rigore & glacie obstupescunt.

Crescente uero sensim die, Solem ipsum ualidio-  
rem fieri sentimus, & nunc hæc nunc illa nu-  
bila depelli, donec æqui data campi copia certa-  
men æquet, & pari cum nocte ui colluctetur,  
quod

quod fit ubi ad æquinoctium uernum peruen-  
 tum est. Inde uictor euadens eo acrius ipse no-  
 etem, ac perinde frigus omne premere & in-  
 sectari perseuerat, quo iniquius ab ea fuerat ha-  
 bitus: factusque quodammodo cali dominus,  
 noctis finibus in arctum redactis, calorem ipse  
 suum per uniuersam hanc plagam ad grauem  
 usque dominationem extendit. Et quoniam re-  
 rum est omnium uicissitudo, cum primum late  
 lasciuiens Cancrum in inuidiam Lunæ, quæ no-  
 eti patrocinator, male multauit, inuiolabili fa-  
 torum lege solum iussus uertere, ad Leonem,  
 qui cum arctissima illi intercedit amicitia, sese  
 recipiens, amittendæ sibi possessionis conscius,  
 quanto potest conatu uires suas omnes effundit,  
 & caniculares illos æstus toto aëre iaculatur.  
 Receptus demum à Virgine Astreæ commen-  
 datur, quæ conata inter eos cõponere, parémque  
 utrique potestatem fieri, nihil quidquam profi-  
 cit: siquidem nox Scorpionibus, & Sagittarijs  
 armata Solem aggreditur, longoque exagita-  
 tum certamine demum fugat, rerum summa ad  
 tempus ipsi frigori commendata.

COMPENDIUM  
DE ECLIPSIBVS.

**R**eliquum est, ut Solis Lunaque labores, eclipses quidem ipsas, hoc est cur modò Luna subitè nonnunquam umbræ interuētū, modò Sol occursante Luna obscurētur, explicemus: curque id non unoquoque Lunæ coitu, & oppositione fieri contingat. Quare animus hoc loco tibi acrius excitandus, & aures depurandæ, ut quæ dicam reſtiffime percipiantur. Memineris autem illud omnium primum, quod paulo ante dictum, Zodiacum ipsum linea quadam, cui nomen eclipticæ, medium ductu perpetuo diffecari, neque Solem unquam ab ea quidquã discedere: eumque semper ordinem seruare, ut eadem semper itet uia. Sedenim Luna hinc digressa ad gradus aliquot toto ferè Zodiaco expatiatur, neque semper sub ecliptica fit obuiã Soli, plerunque autè libera transit eo tantum salutato: quippe Sole in aliquo gradu, puta Cancrì primo existente,

tran-



transilit sæpe Luna ultra tropicum, interdum ad quintum usque gradum ab ecliptica, interdum minus: aut ad inferiora signa prolapsa infra supraue Capricorni tropicum eodem modo deferretur, neque quidquam attingit eclipticã. Atqui necesse est si eclipsis uentura sit tam Solis quam Lunæ, quocunque accidat signo septentrionali, uel australi, utrunq; sub ecliptica deprehendi. Secaret uero ecliptica terram mediam in æqualeis partes, si linea inde demissa, quæ mundi machinam diuideret, traduceretur. Quare, siue terra ipsa Lunæ opponenda sit, ut umbra sua, quæ illud usque exporrigitur, eam obscuret, siue Luna Soli obijciatur, ut lumen eius inuideat terræ, necesse est utrunque planetam sub ecliptica reperiri: & ea de causa linea nomẽ idà grecis inditum, quòd defectuum huiusmodi causa sit



Debes autem animo percipere in duobus ecliptica locis pari graduum intervallo transire in transuersum lineã alteram, siue circulum mauis dicere, per quem

## COMPENDIUM

Luna fertur, qui ab ecliptica resiliens interuallū  
quoddam re-  
linquit ada-  
pertū qua-  
si per scindā.  
Sed ubi con-  
iungitur e-  
cliptica, una  
parte caput  
Draconis,



altera cauda uocatur ab astronomis, huiusmo-  
diq̄ue puncta non secus per celum moueri no-  
bis uidetur, quā Sol & planeta reliqui cursu  
nunquam intermisso perambulant. Eo tamen  
differunt, quod capitis & caudae motus mun-  
dum sequitur undeuiginti diebus uno superato  
gradu, quot itidem anni in coitionum Lunae re-  
ciprocatione numerantur. Atque hic ille nu-  
merus est, quem aureum appellant.


## DE SOLIS ECLIPSI.

**S**I Solis igitur defectus euenturus sit, utrun-  
que tam Lunam quā Solem aut in capite,  
aut in cauda Draconis esse necessarium est: ut  
Luna interposita conspectum Solis adimat ipsi  
terræ



terra, quæ & ipsa, uti superius dictum, sub ecliptica est. Raro uero euenit ut Solis uniuersum corpus obscuretur, quod sæpe accidit in Luna. Quòd autem pars tantum interdum adimatur, ea de causa fit, quòd Luna non semper obuiam fit sub eo puncto uel capitis, uel caudæ, sed iuxta elabitur, quaque parte lineam attingit eclipticam, ea uel luce priuatur, si terra intercedit, uel Soli adimit lucis partem, si iuxta transiens eclipticam omnino perstrinxerit. Sed ut hæc facilius intelligantur, subiicienda figura fuit hæc, quæ moduli uicem gerat.

COMPENDIUM



DE LVNARI ECLIPSI.

Porro si Lunæ defectus contingat, Solem in capite, Lunam in cauda deprehēdi necesse est: aut uice uersa, Solem in cauda, in capite Lunam. Ita enim terra in medio sita, cum umbrae suæ pyramide

imide lunare corpus transiliat, si eam ibi deprehenderit, tantisper occupat, donec illa eluctata per horas plurimum treis, aliquando quatuor, euadat: ex umbraq; illa omni paulatim excepta totius mox orbis candorem ostendet.




Atque hic est Luna, quem aiunt, labor: putabant enim homines huius ueritatis ignari, quotiens id accidebat, laborare Lunam ex incantationibus maleficorum hominum, & ea de causa cymbalorum tinnitu, & clamoribus occurrendum instituerāt: ne scilicet Luna ex cantantium uoces audire posset, atque ita minus obsequi cogeretur. Sed hæc rudioris ætatis deliria fuerunt.

CVR FACIES LVNÆ  
uaria.

**N**on est autem loco hoc praterendum, Lunā, quam modo toto orbe plenam, modo tuberosam, modo dimidiam, modo excuari & ad nihilum redigi unoquoq; mense conspiciamus, id ea de causa pati, quia dimidium tantum lunaris corporis lucet, quod scilicet à Solaribus radijs illustratur. Hinc fit ut cū Luna in oriēte est, Sol uero in occidente, aut cōtrā, oculus noster, qui medius est inter utrunq;, eam Lunaris corporis medietatem aspiciat, quæ à Sole irradiatur, aque ita tota candicare uideatur. Vbi uero à diametro secedere incipit, ea de causa nobis imminui uidetur, quia pars illustrata per obliquū auer-

auertitur, atque ita oculis nostris eripitur. Ita cū eadem in cæli quadra prima uel tertia reperitur, dimidia sui parte nobis sese uidendum offert. Mox quò magis ad Solem appropinquat, eò magis superior pars illustratur, quæ ab obtutu nostro semota est: inferior, quæ scilicet ad oculos nostros obuersa est, obscuratur, aut potius deficere uidetur. Et cum Soli demum subiecta est, luminosa eius parte tota ad Solē uersa, nobis qui infra sumus, illuminis apparet, donec à Sole recedens tertia mox die obuersæ in  $\Delta$  literæ speciē sese nobis uisendam præbet, ac dāno mox quotidie reparato magis increfcens, usque ad quintumdecimum diem, paulatim auēta, toto iterū corpore sese illustratam ostentat.


COMPENDIVM



QVID NOX, QVID DIES SIT.

**N**Equè illud ignorandum est, diem aut à  
tempore, aut à qualitate intelligi. à tem-  
pore

pore quatuor & uiginti horis constare, à qualitate esse aërem illuminatum, à Sole supra horizontem euecto, & quàm diu moram ibi traxerit, ad occasum usq;: noctem uero nihil aliud, quàm terræ umbram: atq; euenire semper, ut si-



mul ac Sol infra horizontem deciderit, umbra hæc oboriatur, terramque obfuscet media sui parte, diametro cū Solis progressu semper mobili. Itaque non ante dies est, quàm Sol iterum supra horizontem emergat. Accidit tamen, ut

## COMPENDIUM

Sole per gradus duodeviginti infra horizontem, ut Ptolomæus, tam in exortu quàm in occasu existente, lumen eius supra diffundatur: atque ita fermè per horã anteaquam oriatur, & posteaquam occiderit, adhuc lux in superiore hemisphærio maneat, idq; tempus Latini crepusculum uocauerunt. Habes iam adolescens honoratissime, sphaera summam, quemadmodum tota mundi machina orbicularis fingitur, & ut ipsi cælorum orbis quatuor & uiginti horarum spatio circumuoluuntur, quæque sua unicuique inferiorum sit cessationis causa. Habes elementa quatuor infra cælum Lunæ, terramq; in medio omnium: quibus tota hæc constat fabrica, pro centro reductam. Habes de polis duplicem considerationem & uertiginum uarietates, æquinoctialem, zodiacum, tropicos duos, & polares totidẽ circulos, quos una cum coluris duobus tibi descripsimus. Circulos mobiles, finitorẽ & meridionalem cõmonstrauimus: quid sphaera reeta, quid obliqua sit ostendimus: Solis & aliorum planetarum diurnos annuõsq; motus, quantum ad ortum & occasum pertinet, indicauimus. De zonis quinque & parallelis, unde æqualitas, & inequalitas dierum & noctium accidat, differuimus: ad hæc, unde calor & fri-



gus resultaret aperuimus. mox defectuū tam  
 in Sole quàm in Luna causas modumque non  
 modo retulimus, sed oculis propemodum subie-  
 cimus: quæ quidem ad eam quam affectas geo-  
 graphiæ peritiā satis tibi superque opis al-  
 latura sunt. Reliqua de exacto calorū numero,  
 de epicyclis, de eccentricis, & deferentibus cir-  
 culis in planetarum sphaeris, de motuum quo-  
 rundam trepidatione, quæ astronomorum sub-  
 tilitas excogitauit, sed quibus ægre philosophi  
 assentiuntur, quæque authores eosdem perplexa  
 loqui cogunt, neque ad hoc negotium, neque ad  
 studia nūc tua pertinere arbitrati sumus. Qua-  
 re ijs, & sublimiori doctrina illa, quæ eruditis-  
 simi Viterbiensis tui propria est, dimissis, tibi per  
 immensos terrarum marisque tractus ingres-  
 suro, hæc de sphaera dicta sufficere iudicauimus.

F I N I S.

DE ECLIPSIBVS

Donati Villaltæ Feltr. physici Carmen,  
ad Pierium.

Duxisse Phœbum te per alta sidera,  
Vraniam aut ipsam puto,  
Pieri Aonidum decus sororum:  
Qui, dum situs, uagos meatus orbium,  
Dum temporum uarias uices,  
Dum Lunæ coitus, graues labores,  
Quæ signa flexo deferantur circulo,  
Errantia aut quæ commeent,  
Fixa stellifero uel astra olympto;  
Dum cuncta demum, quæ tenet cæli ambitus,  
Tali ordine, ut meritò queat  
Mirari sapiens, rudus doceri,  
Breuissimo complecteris compendio,  
Terras polòsque munere  
Tam docto tibi Pieri obligasti.

DE ECLIPSIBVS EX

Proclo.

**I**N uniuersum cū acciderit eclipsis alterutrius  
☉ aut ☽ in ♄, ♀ aut Cap. fructuum penuria,  
& præcipue frugum satorumque continget. in  
♄, ♀, & ♀ fames & atrocissimæ agritudines,  
morbo

morborumq; pestes mortalibus ingruere astro-  
nomi obseruauerunt. In ♄, ♃, & ♀ obscuræ  
turbæ, ignobilisque plebeculæ interitus, diurnæ  
bellorū seditiones, & aquitiliū marinorumq;  
& aliorum in æquore degentium magna per-  
niciēs. Quartus trinus in signis ♃. ♁. ♀. Unde  
argumentum hoc exordiebatur, explicari non  
potuit, quia codex græcus corrosus erat prima  
statim pagina. Sed quid ibi cōtineretur ex unius  
cuiusque signi decanis satis apparebit.

Effectus iudiciarij ob Solis eclipsim per  
decanos singulos.

Sol cum laborare uisus fuerit in aliquo ex pri-  
mis decem gradibus ♃, crebros armorum &  
exercituum motus portendit, continuasque ex-  
peditiones, & insultus bellorum cum tumultu  
plurimo: Seditiones, controuersias & intem-  
periem aëris ad siccitatem potissimum uergētis.

In sequenti uero decano regis carcerem, mœ-  
rorem, aut mortis periculum, arborumque fru-  
ctiferarum corruptionem, ac terra nascentium  
putredinem. in ultimo denario tristitiam, &  
luctum affert mortalibus, magnæque mulieris  
obitum, & ad hæc pecudum perniciem mini-  
tatur. In ♄ uerò denario primo negotiatores  
affligit, & irrita tractare cogit, omniaque eorū

negotia subruit, satis quoq; & segetibus obest. In altero decano peregrinantibus, parturientibusque parat incommoda. In postremis, pestemque famemque inducit. In  $\text{II}$  primis  $\text{x}$  gradibus sacerdotibus, & in quouis ordine sacris initiatis dissentionem, lites, & seditiones aggerit: odia infanda, legum contemptum, & pietatis etiam neglectum concitat. In  $\text{x}$  mediis latocinia maritima, & cedes. In ultimis  $\text{x}$  regis obitum, & status publici detrimenta uaria, ciuiliũque negotiorum irritos euentus.

In  $\text{S}$   $\text{X}$ . primis gradibus aërem perturbat, magnaque exagitat uarietate. In secundo decano fluuios & fontes exiccat, incōtinentiam, & petulantiam mortalibus intentat. In ultimis  $\text{X}$ . gradibus per uniuersam Armeniam, & Africam, ceterasque regiones Cæcro subiectas, morbos, seditiones, & lues alias immittit.

In  $\text{Q}$  denario primo summi alicuius principis mortem, & rei frumentariæ penuriam præmonstrat. In secundo, regis, magnatum, & procerum anxietates & detrimenta minitatur. In ultimis captiuitates, obsidiones, direptiones, & ædium sacrarum profanationes.

In  $\text{IY}$  decano primo, calamitosum regis alicuius exitum, & stragem arguit.

*In secundo famem, pestem, & seditiones mortalium.*

*In ultimo, pictoribus, poetis & Mercurialibus, qui ingenio uigent, aduersa omnia, cædes, exilium, & similia.*

*In x primis gra. ☽ aërem corrūpit, pestem suscitatur, & annonam flagellat, carāmq; reddit. In medijs magni regis mortem, seditiones, & famem portendit. In ultimis nobilium cōtrouersias, & fortunarum detrimenta.*

*In iij denario primo tumultus bellicos mouet, cædes, odia, captiuitates, & prodiones machinatur.*

*In medio, regis cuiuspiam perniciem, auersum exercitus animū, & similia. In ultimo, alienigenæ tyranni aduentum, ignauiam atque sordiam prioris regis omnibus inuisam.*

*In x primis ♃ gradibus seditiones inter mortales manifestas ostendit, & ab omni consensu, concordiamque abalienationem. In x medijs, camelorum, rudentūque iumentorum, ac ceterorum eius generis ueterinorū animalium interitū. In ultimis & equos, & exercitus multifariam affligit. In ♄ decano primo infelices habet magnorum uirorum casus, regis alicuius transmigrationem, nobilium & plebis re-*

belliones. In medio denario iuratos milites in imperatorem, ductoresque suos irritat: conatusque eorum irritos, aut infelices euentus facit. In postremo tumultuarium regis motum cit, famem inducit. In  $\approx$  primis x. gradibus publici mœroris & luctus materiam præbet. In x medijs latrocinia publica, furta, rapinas, terræ motusque, & famem comminatur. In ultimis, ouium, agrestiumque brutorum eiusmodi interitum innuit. In  $\sphericalangle$  decem primis gradibus fluuios exiccat, maritima infortunat. In medio decano clari præstantisque uiri mortem, ac in maritimis regionibus piscium uastitatem, terræque motum facit. In ultimo denario seditionem, crudelitatem, ferociam, & inhumanitatem militum extimulat.

## SVPER ECLIPSI LVNAE

Proclus idem.

**I**N  $\sphericalangle$  decem primis gradibus obscurata Luna febres futuras, ædium incendia, combustiones nemorum, ac aëris siccitatem ostendit. In medio denario pestilentiam.

In x ultimis gra. abortiuos partus, & incōmoda, periculāq; huiusmodi alia in mulieribus.

In  $\sphericalangle$  denario primo, nece, morbōque grassatur in pecudes.

*In x. mediis gradibus reginae obitum, & factorum seminumque sterilitatem immittit.*

*In ultimis, in serpentes, & reptilia seuit.*

*In II decem primis gradibus incursiones & rapinas hostium minitatur.*

*In x mediis repentinos exercituum motus, priuatarum, publicarumque rerum sollicitationes.*

*In ultimis, praestantis fama uiri obitum ostendit.*

*In 6 denario primo bellum omnino concitat.*

*In secundo exactiones acerbas, tributa intolerabilia, & huiusmodi onera portendit.*

*In ultimo, sexui muliebri morbos, subitas, miseris, repentinamque neces minimitatur.*

*Id 8 x primis gradibus, uel celerem regis alicuius infirmitatem, uel praecleari cuiuspiam uiri mortem adducit.*

*In x uero mediis regis iter, & aliquam rerum mutationem accersit.*

*In ultimis, exercitus populisue excitat ad res nouas.*

*In III decano primo agrotationes regum inducit, atque hominum uarias discordias & seditiones. In secundo, in consultores, scribas, & huiusmodi hominum forese genus perniciem parat.*

*In ultimo mortalibus morbos affert.*

*In decem primis gradibus, grandines &*

*frædas alias tempestates prouocat.*

*In x medijs, uiligeneis omnibus pernicio-  
sa est.*

*In ultimis, magni clariq̃ue uiri interitum mi-  
natur.*

*In m x primis gra. horrenda tonitrua &  
fulgura portendit, & interdum terræ motum.*

*In decem uero medijs, oliuas & aërem ex-  
siccat, & febres æstuosas facit.*

*At in ultimo decano, eadem minitatur, atq;  
in super inter mortales plurimum sæuit morbo,  
rixis, seditionibus, cædibusque.*

*In ♃ x primis gra. latrocinia, & rapinas  
immittit. In x medijs, in equos, & in mulas  
desæuit. In ultimis pestem afflat, & mala inter  
mortales plurima.*

*In ♃ decano primo suggillationes in homines  
mouet, & præstantis alicuius uiri perniciosam  
cadem ostendit.*

*In medio decano crebros militum insultus,  
incurSIONES crebras, latrocinia & captiuitates.  
In ultimo, regis alicuius mortem & seditionẽ.*

*In ♃ x primis gra. malam regi cuiquam ua-  
letudinem indicat affuturam. In x medijs se-  
mentem lædit uniuersam. In ultimis insignem  
rerum omnium mutationem facit, qua tamen,*

qui-



quicumque grauiora perpeſſi fuerint, à malis liberentur.


In X denario primo, ſacerdotibus, & æditi-  
mis antiſtitibusq; luctum, & moerorem affert.  
In medio, magni, præſtantisque uiri obitum.  
In ultimo latrocinia, & rapinas terra mariq;e  
promiſcuas minuitur.

FINIS.

*[Faint handwritten notes in Latin script, likely bleed-through from the reverse side of the page. The text is largely illegible due to fading and overlapping.]*

*[Handwritten signature or scribble at the bottom of the page.]*

11. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33.



2001  
 2002  
 300

2001  
 1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100

R  
 R  
 R

This is a list of numbers from 1 to 100, with some numbers crossed out or marked. The numbers are arranged in a grid-like fashion, with some numbers appearing to be grouped or separated by lines.

